

קומינצא לוי ליברו די יונה :

.1

1. אי פֿו פֿאַראַוילע די דומידיה אַה יונה פֿיליוו די אַמיתי אַה דיִרי :
2. ליִואטי וַא אַה ניִנָהּ לַה ציטאדה גֵרְהֵנָה אַי קֵלאַמָה סופּיפֿירה די אַיסי קי סאַליוו לוי מאלו לורו דינאַנצִי די מי :
3. אַי סי ליִואוו יונה פֿיר פֿוִיירי אַה תְּרָשִׁישׁ דַא דינאַנצִי די דומידית אַי שיסי אַה יִפֿו אַי אַטְרוֹוֹוו נַאָה וַיְנִיָהּ אַה תְּרָשִׁישׁ אַי דיטי לוי פֿריצו סואו אַי שיסי אין אַיסי פֿיר וַיְנִירי קון אַיסי אַה תְּרָשִׁישׁ דַא דינאַנצִי דומידית :
4. אַי דומידית יִטֹאוו וַיְנִטוּ גֵרְאָנוּ אַה לוי מַאָרוּ אַי פֿו טינפֿיסטָה גֵרְאָנָה אין לוי מַאָרוּ אַי לַה נַאָה פֿינצֵאָה אַה אַיִסִירי רוטָה :
5. אַי טימירו לוי מאַרינאַרי אַי אוראַרו אומו אַה דית סואו אַי יִטֹאָרוּ לוי ואשילי קי אין נַאָה אַה לוי מַאָרוּ פֿיר ליזירירי דַא סופּיפֿירה די אַיסי אַי יונה שיסי אַה פֿידיציני די לַה נַאָה אַי יַאקוּוּי אַי סורְנִיפֿיקָאוּ :
6. אַי סי אַפֿריסימוו אַה אַיִסוּ לוי מאַיורוּ מאַרינאַרוּ אַי דיסי אַה אַיִסוּ קי אַה טי סורְנִיפֿיקָאָטוּ ליִואטי קֵלאַמָה אַה לוי דית טואו פֿורצָה סִירָה וולטָאָטוּ אַה לוי דית אַה נוֹאִי אַי נון צי דיפֿירדִירִימוּ :
7. אַי דיסירו אומו אַה לוי קונפֿאַניוּ סואו יִיטי אַי יִטֹאָרימוּ סורְטי אַי סאַפֿאַרימוּ פֿיר קאַשוֹנָה די קי לוי מַאָלוּ קוּוּיִסטוּ אַה נוֹאִי אַי יִטֹאָרוּ סורְטי אַי קאַדי לַה סורְטָה סופּיפֿירה יונה :
8. אַי דיסירו אַה אַיִסוּ אַנונצִיאָה מוּ אַה נוֹאִי אין קי פֿיר קי לוי מַאָלוּ קוּוּיִסטוּ אַה נוֹאִי קי אַי לַה אופֿירה טוּוָה אַי דַה דוּוָה וַיַאִי קי לַה טִירָה טוּוָה אַי די קוּוּאַלוּ פּוּפֿילוּ סי טוּ :
9. אַי דיסי אַה אַיסי יוּדיאַוּ אַייוּ אַי דומידית דית די לי צילי אַייוּ טימוּ קי פֿיצי לוי מַאָרוּ אַי לַה סיקָה :
10. אַי טימירו לוי אומיני טימינצִיאָה גֵרְאָנָה אַי דיסירו אַה אַיִסוּ קי קוּוּיִסטוּ פֿאַציִסטִי קי סאַפֿירוּ לוי אומיני קי דַא דינאַנצִי דומידית אַיִסוּ פֿוֹאִיוָה קי אַנונצִיאָוו אַה אַיסי :

11. אי דיסירו אה איסו קי פֿאַרימו אה טי אי טאצירה לו מארו דה סופירה
די נואי קי לו מארו ואו אי טינפֿיסטאנו :
12. אי דיסי אה איסי אלציטי מי אי ייטיטי מי אה לו מארו אי טאצירה לו
מארו דאסופירה די וואי קי סאצו אייו קי פיר מי לה טינפֿיסטה גראנה
קוויסטה סופירה די וואי :
13. אי נאויגארו לי אומיני פיר טורנארי אה לה סיקה אי נון פודיטירו קי לו
מארו יונה אי טינפֿיסטאנה סופירה די איסי :
14. אי קלאמארו אה דומידית אי דיסירו מו דומידית נון מו צי דיפֿירדימו
פיר אנימה די לו אומו קוויסטו אי נון דארי סופירה די נואי סאנגוה
מונה קי טו דומידית קומי וולאנטאסטי פֿאַציסטי :
15. אי אלצארו יונה אי ייטארו איסו אה לו מארו אי סטיטי לו מארו די אירה
סואה :
16. אי טימירו לי אומיני טימינצאה גראנה די דומינית אי סאקרֿיפֿיקארו
סאקרֿיפֿיצאוו אה דוידית אי ווטארו ווטי :

.2

1. אי אפאריקלאוו דומידית פישו גראנו פיר אינגילוטירי יונה אי פו יונה אין סטינטני די לו פישו טרי די אי טרי נוטי :
2. אי אוראוו יונה אה דומידית דית סואו דה סטינטני די לו פישו :
3. אי דיסי קלאמאיי די אינגוסטיאה אה מי אה דומידית אי ריספואסי מי דא וינטירה די פוסה גרידאיי אינטיניסטי ווצה מיאה :
4. אי ייטאסטי מי פריפונו אין קורו די מארי אי פלומו אזיראוה מי טוטי לי רוטי טואי אי לי אונדי טואי סופירה די מי ואריקארו :
5. אי אייו דיסי פואי קאצאטו דא קונ טירה לי אוקילי טואי טאנטו אדוויאראיי אה גוארדארי אה לו טינפילו די סאנטוואריאו טואו :
6. אזירארו מי אקווי פונה אנימה אוויסו אזיראוו מי קאניטו אינפאשאטו אה קאפו מיאו :
7. אה פני די מונטי שיסי לא טירה לי אינצארימי סואי פיר מי אה סינפירי אי פאציסטי סאלירי די פוסה ויטה מיאה דומידית דית מיאו :
8. אין איסירי סטיראנגושאטו סופירה די מי אנימה מיאה דומידית מי ריקורדאיי אי ויני אה טי אוראציאונה מיאה אה טינפילו די לו סאנטוואריאו טואו :
9. גורדינו ואקאנטיאי די פאלציטאדה מיסיריקורדיאה לורה לאסינו :
10. אי אייו אין ווצה די מאניפיסטה סאקריפיקאראיי אה טי קוילו קי ווטאיי דימאנאראיי סאלואציאונה אה דומידית :
11. אי דיסי דומידית אה פישו אי ריציוו יונה אה לה סיקה :

.3

1. אַי פֿו פֿאַראַוילע די דומידית אַה יונה סיגונה אַה דירי :
2. ליויטי וַה אַה נינה לה ציטאדה גראנה אי קלאמה אַה איסה לו
קלאממינטו קוויסטו קי אייו פֿאוילו אַה טי :
3. אַי סי ליואנו יונה אַי ייוו אַה נינה קומו פֿאַראַוילע די דומידית אַי נינה
אירה ציטאדה גראנה אַה דומידית ויאיו די טרי די :
4. אַי קומינצאוו יונה אַה וינרי אין לה ציטאדה ויאיו די די אונה אַי
קלאמאוו אַי דיסי אנקורה קוואראנטה די אַי נינה סירה ריוולטאטה :
5. אַי קריסירו לי אומיני די נינה אין דומידית אַי קלאמארו דיונו אַי
ויסטירו סאקי דא גראנו לורו פינה מיצינו לורו :
6. אַי טוקאוו לה פֿאַראַוילע אַה לו רי די נינה אַי סי ליואוו דא לו סידיאו
סואו אַי פֿיצי ואריקארי לה קקילאוינה סואה דה סופירה די איסו אַי
קרופיוו סאקו אַי סידי סופירה לא צינירה :
7. אַי פֿיצי קרידה אַי דיסי אין נינה דה פֿאַרטה די לו רי אַי גראני
מאייסטירי סואי אַה דירי לי אומיני אַי לי ניסטיאי לי ואקי אַי לי פיקורי
נון אַסאייאראנו קיבילי נון פֿאַשיראנו אַי אַקווי נון ביאראנו :
8. אַי סיראנו קופירטי די סאקי לי אומיני אַי לי ביסטיאי אַי קלאמאראנו אַה
דומידית אין פֿורטיצה אַי טורנאראנו אומו די ויאַה סואה ריאַה אַי די לו
טורטו קי אין מאני לורי :
9. קי סאו טורנארה אַי סירה ריקונצולאטו דומידית אַי טורנארה די אירה
די פֿורורו סואו אַי נון צי דיפירדירימו :
10. אַי וידי דומידית לי אופירי לורי קי טורנארו די ויאַה לורה לה ריאַה אַי
סי ריקונצולאוו דומידית פֿיר לו מהלו קי פֿאוילאוו אַה פֿאַרי אַה איסי אַי
נון פֿיצי :

.4

1. אי פארצי מאלו אה יונה מאלו גראנו אי סי אדיראו אה איסו :
2. אי אוראו אה דומידית אי דיסי מו דומידית ייה קוויסטו פאראוילה מיאה פֿינה איסירי אייו סופירה טירה מיאה פֿיר צו אדיציפאיי אה פואירי אה תרשיש קי סאפי קי טו דית גורדולייסו אי ריפייאטוסו לונגו די פורורו אי מולטו די מיסיריקורדיאה אי סי ריקונצולה סופירה לו מאלו :
3. אי מו דומידית טוליי מו לה אנימה מיאה די מי קי מיליי מורירי מיאו פלו קי ויטה מיאה :
4. אי דיסי דומידית סי מולטו סי אדירו אה טי :
5. אי יישיוו יונה דה לה ציטאדה אי סטיטי דה מזרח אה לה ציטאדה אי פֿיצי אה איסו לה קאסילה אי סטיטי סוטה די איסה אין אונביריאה פֿינה קי יידינה קוילו קי אירה אין לה ציטאדה :
6. אי אפאריקלאוו דומידית דית צוקארו אי סאליוו דה סופירה אה יונה פֿיר איסירי אונביריאה סופירה לו קאפו סואו פֿיר סקאנפארי אה איסו די מאלו סואו אי סי אליגראוו יונה פֿיר לו צוקארו אליגריצה גראנה :
7. אי אפאריקלאוו דומידית ירמו אין סאלירי לו אלורו אה לה אלטירה די אי באטיוו לו צוקארו אי סי סיקאוו :
8. אי פֿו קומו סקילארירי לו סולו אי אפאריקלאוו דומידית ינטו פֿריצינה טאציטו אי באטיוו לו סולו סופירה לו קאפו די יונה אי פֿו סטיראנגושאטו אי דומאנאו אנימה סואה אה מורירי אי דיסי מיליי מורירי אייו פלו קי ויטה מיאה :
9. אי דיסי דומידית אה יונה סי מולטו סי אדיראו אה טי פֿיר לו צוקארו אי דיסי מולטו סי אדיראו אה מי פֿינה מורטה :
10. אי דיסי דומידית טו גורדולייאסטי סופירה לו צוקארו קי נון טי אפאדיגאסטי אין איסו אי נון אינגיראניסטי איסו קי אינפֿירה נוטה פֿו אי אינפֿירה נוטה סי פֿירדיוו :

11. אי אייו נון גורדוֹלֵי־אַרַאִיִּו סופירה נינה לה ציטאדה גראנה קי צי אין
איסה פלו די דודיצי מירדיארי די אומיני קי נון קונושי אינפירה דיריטה
סואה אה מאנקה סואה אי בייסטיאי מולטי :

פֿיניטו לו ליברו די יונה :